

四庫全書

集部

欽定四庫全書

集部

東里續集卷五十五

詳校官檢討

臣羅國俊

中書

臣

劉源溥覆勘

總校官進士

臣楊懋珩

校對官庶吉士

臣毛鳳儀

謄錄貢生

臣戈廷模

欽定四庫全書卷

東里續集卷五十五

明 楊士奇 撰

詩 五言古

退思軒為淮陽劉千戶賦

結髮在軍中幸際熙明時
聲教洽四海不聞羽檄馳
家承厚祿貴身有好爵
縻雖懷鉛刀用一割不及施
自顧草木微芳澤振華滋
感激天地恩胡能分寸裨
惟應篤忠貞庶不忝恩私
庶事如蠅毛何以適攸宜
發已一失

經臣職隳自茲豈但羞榮寵安危誠係之歎歎內自懷
兢兢恒自持高軒敞弘麗退食時在斯先哲有明訓揭
以為箴規

題范仲倫紀善攀桂軒

團團青桂樹高高凌紫虛根本積深厚柯條鬱紛敷風
雲蕩杳靄雨露涵浸濡當春競妍華不與桃李俱秋氣
悴萬卉孤芳乃芬如金彩耀朝暉天香含滿裾軒居延
爽霽靜對古人書觀道可適懷何必傾一壺居止得嘉

蔭悠然塵慮祛緬惟種植勤今來百歲餘先人義方訓
遺我以良圖幽貞婉令德安敢廢斯須光華際昌辰歟
起應時需攀援聊淹留非為樂其初念茲保明誠歲晏
以終譽

送王孝子歸成都

其初巴陵人省其姊來金陵

蜀嶺春雪消秦淮新水衍萬里蜀中人見水思鄉縣去
年在親側今年在帝畿非緣同產故誰肯離親闈一朝
復一朝思親心若燬問君刳股時痛迫何如此初發白

鷺洲忽過黃鶴樓
巴陵尋舊里荆門沂上游
家林行漸邇
筭程應預喜猿嘯豈闕情
鶻啼空在耳倚門望萊衣
踉蹌五色歸供饌黃魚美
登盤丹荔肥親年方壽考
歸來誓相保長承膝下懽
不出門前道

送陳景著編脩以母老乞近地得福州教授

振佩謝彤陛驅車出重城
堂中有壽母奉以趨脩程
秉志存事君母也迫衰齡
仰荷聖主仁俯諧烏鳥情
維時六月中流金赫炎蒸
行路豈不難適願心孔寧
濟濟玉

堂侶祖餞羅冠纓眷言夙昔好何以贈子行易得四海
譽難致鄉里名矧乃來學衆逝將於我承黽勉慎所操
庶用闕休聲

送聶教諭赴貴州

聶屢見過不遇留卷
求贈言賦此見意

往與子別者乃在江漢湄江漢日夜流歲月忽如馳相
思隔川岳於今已十期子家清江曲夙有溫厚資少小
入鄉校育德窮書詩中歲登成均鴻鵠摩天涯金石協
其音佩玉昭其儀拜為博士官小試百里師誥誥遊學

徒左右侍臯比成德與達才造就咸適宜九載績用成
入奏趨彤墀陞遷荷榮寵欣欣遂其私職不踰文教出
不越皇畿明晨整行裝王程詎能違嗟子契濶懷慰悅
宜在茲終焉垂所願坐以職務縻過門弗及逖出祖弗
及追引望池陽峯曷慰中渴飢幸逢熙明運會合諒有
時惟應保貞素遲暮以為期

題訪戴圖

寒宵雪初霽明月照庭前獨酌山陰酒含詠招隱篇良

朋忽興念懷徃方浩然泝洄剡中行玉色晃山川道長
興易窮回艫遽言旋性情自不羈動止故無牽放曠非
可則猶為畫者傳

題文丞相字

文丞相為吉水解氏大書生香翰
墨之隙六字解之孫文夫求題其

後

惠風布和氣流雲度春陰時卉播芳潤嚶鳴懷好音
中理琴罷逍遙翰墨林圖帙左右陳永謝浮慮侵靜觀
悟玄化油然適我心奄忽百歲餘名德揚至今煜煜文

山書尚照文水潯惟應嗣世者持用寶南金

謝賜嘉禾詩

有序

永樂三年九月朔旦上闕中秘書得太祖聖神文
武欽明啟運俊德成功統天大孝高皇帝御製嘉
禾詩聖孝深至將垂示於萬萬年乃命摹刻以賜
諸王廷臣龍章玉刻雲漢昭回臣忝職侍從均拜
鴻恩齋沐莊誦有以窺見帝王功德之隆矣蓋嘗
竊論古者帝王之盛未有過乎唐虞三代之君其

始無不本於得天其行無不急於除暴安民是以
民心和於下天心和於上豐年屢應百祥萃臻而
為泰和之世元之季世上失其政寇攘四興民墜
塗炭我太祖皇帝誕膺天命提一旅之衆恭行天
討東征西怨南征北怨掃刮兇暴挈天下無告之
人舉納之康寧之域母養而父訓之由是仁浹義
洽黎民豐足政化脩明禎祥協應與唐虞三代泰
和之世同功而共效矣斯皆臣之所躬被目睹固

不應聖製而後知之若夫致祥之由一歸天錫不謂已功而歉然不自滿假之心與堯舜禹湯文武同一聖德者實由聖製而知之也皇帝陛下統承大寶君主萬方繼志述事孝治益隆天下林林總總之生遭遇何幸蓋堯舜禹湯文武之道傳至於太祖皇帝今又傳至於陛下矣陛下敬承善繼永篤不忘故雖手澤一篇一詠皆以為聖道所存必欲著明永示無極臣獲睹天章已極榮幸而況於

親受寵賜者乎隆恩至寶豈如其他世世貴重之
賜之比懼愉之情倍萬常品用作五言詩一首以
著瞻仰欣悅之意謹寫上進詩曰

玄天肇昌運皇明啟隆祚有赫清泗濱篤生我皇祖於
維皇祖聖桓桓秉神武于時草昧際陰氛蔽寰宇受命
提天戈弔民麾虎旅吳楚掃攬槍幽并驅羆虎函夏復
清寧窮擱息咻噢迤邐五教敷從容九功叙絃歌亘遠
域鋤耨隘荒野浸淫俗化淳汪洋德施普昊天監昭事

駢蕃荅純嘏五緯無留逆四時皆順序休祉萬斯臻豐
年豈惟屢大田毓禎穀芄芄映黍稌聖世躋泰和聖情
聊暇豫雍雍發歌詠輝輝祭毫素文如虬龍躍又如鸞
鳳翥音如咸韶會氣如春陽煦上樂帝眷顧下樂民康
富丕顯並周文不矜同似禹於維我皇祖功德侔三五
俯睨漢與唐陋哉疇比數宸章隱中秘至寶終明著陛
下握乾符垂衣纘鴻緒琬琰昭大刻臣工拜嘉子旦旦
睹奎光淵淵仰皇度誠由陛下聖心存有虞慕益勤繼

述志遂隆顯揚務睿製超百王至孝踰千古敬擯輿人
言陳詩獻當宁

望雲詩

有序

太常王侯勉自皇上龍飛之初超拜少卿而卿久
闕侯總太常事敦厚易直國家有事于天地宗廟
百神侯練習典禮相事秉虔膺受恩眷榮且重矣
侯陝西蒲城人蚤喪其父率其弟勵勛事母夫人
能孝既舉鄉貢出仕而其心未嘗不在母側嘗一

迎就養京師居數歲母夫人不忘其鄉之樂也勵
勗思有以寧其母之心相與奉歸而侯重去其親
忡忡焉如不可一朝居也侯之子謙自請歸養大
夫人冀以寧其父之心夫父子兄弟相篤於孝行
如此豈非以侯為之表率哉克孝於親者必忠於
君今侯仰荷國恩榮且重誠明乎義而力乎所當
務將其行之可稱於時者不尚多乎故為賦古詩
一首述其事且致望於他日云

少小失所怙鞠我仰母氏我今已成立母氏隔千里朝
亦思母慈暮亦思母慈愁腸日九迴朝暮千萬思官列
九卿貳迎養失所願母來止歲餘母樂歸鄉縣雖有兩
賢弟致敬奉母居我獨不在側何以紓鬱紆荷君恩寵
深憶母道途遠仰首望飛雲秦山長在眼小兒解父意
願父勿憂歎我歸養大母父但忠王官一門隆孝行父
子及兄弟所以白髮親怡怡膺壽祉敦行用表率豈不
自一身觀感動鄉里詠歌揚縉紳君親同所尊忠孝匪

二道努力慎克終來世焯有耀

明明處士輓詩 有序

余童丱數從海桑陳先生游郡城必主劉復初時
先生族孫仲述教授其家復初之尊甫明明處士
春秋七十餘皓然白顛頽身玉立雍容言論而延
禮先生愈久愈敬復初為人溫然端厚以學問為
務執所業請益無須臾懈怠先生器重之異於衆
也孟子言觀近臣以其所為主孔子稱子賤必本

於魯之君子處士其賢乎哉後數歲先生捐館復
初自郡庠陞太學為給事中仲述亦取進士去相
繼以沒惟處士康寧無恙余雖未獲再造劉氏追
惟曩昔遊從之樂老成典刑風流文采未嘗忘余
懷也洪武壬午處士沒於家余聞而慨嘆焉今年
見處士少子彥信於京師示余易闇謝先生所為
處士墓誌及翰林學士解公所為墓表讀之益不
能釋懷因作輓詩一章以著余之思而處士之所

為可傳者亦庶幾可想見也

岩堯金螺山螺山水逶迤螺水逝不還螺山空雲飛我
懷賢達人寂寞今安之在世無所繫去去忽如遺鬱鬱
喬松樹舟車諒所宜何為南山中空負高潔姿寒暑若
循環四時屢遷移傲兀冰與霜欣榮遲暮時中有丹鳳
雛五章備羽儀高舉戾阿閣嗃嗃鳴朝曦鳳雛忽已去
喬松復傾摧瞻望杳不及行者皆歔歔俯仰念疇昔我
獨有餘悲矯首睇螺山閣淚書此辭

輓永嘉胡處士

流波逝不息時序無停遷嗟彼泉下人一往不復還
追惟在世時卓犖稱英賢芳馨佩蘭茝被服夫容鮮幽居
玩玄化歷探義皇前步履率周行飲濯必清泉一朝遂
征風飄然若雲烟反終自常道懷德諒難捐幸睹五色
雛及時厲高騫黽勉務顯揚夙夜志惓惓煌煌金石詞
足為永代傳

送謝憲使還廣西

謝公青雲器發身自科名初命屬司寇特達蜚賢聲十年典大郡政化龔少卿遂陞董外憲八桂歌澄清展矣冰雪操諒哉矜恤情聖人御寰宇簡賢寄嫠嫠安得皆若人四海臻咸寧春蘭花始開述職趨明廷我昔嘗同朝相見慰平生握手甫一再驅車復南征故寫嚮往意聊贈萬里行

送黃知府還瓊州 三首

蕭蕭朔風勁慄慄年歲徂積雪橫山岡凝冰塞川途念

子萬里行相送城南隅寒樹渺蒼茫誰能忍離居

離居昔不淺晤語今還促郡府分南滇烝黎望賢牧寒
暉動飛旆浮埃暗馳轂遠舉凌冥冥臨岐羨鴻鵠

鴻鵠翔翩翩倏忽天之涯丈夫抱竒才致用貴及時山
川歷緬邈何以贈仝離永矢冰雪操遲暮以為期

輓凌孝子

閩有凌孝子十六丁喪亂辛苦奉雙親巖谷日奔竄晨
汲寒澗飲暮拾枯薪爨跬步皆畏途觸目增愁嘆百死

幸脫歸雙親，遄棄違。艱難殯淺土，慟哭血淚揮。孤身惟
影伴，犂犂竟何依。經年寇盜息，來返鄉園扉。拮据葺屋
廬，黽勉遂家室。處宗仁有施，處鄉義無失。寧辭薦辟榮，
甘就原丘逸。云胡未下壽，蓋棺事奄畢。昔有江巨孝，漢
史高其人。誰言千載下，令德無與倫。天道遠弗爽，為善
福必臻。凌氏身後榮，煌煌垂不泯。

陶氏榮節堂

人生伉儷情，所願偕白首。二九歸陶家，三八為孀婦。抱

持襁中兒辛苦難具論矢心只如一兒大今有孫紫鳳
啣天書光華見旌表孫長登科名更覺門庭好皇天佑
節義降福無窮期永歌榮節堂聊繼栢舟詩

輓詩

歐鄉有貞士蕭散離塵俗家庭崇孝德宗嫻重惇睦交
友執信義恂恂在鄉曲雅度廓有容好善如不足浮雲
抗志尚蘭茝充佩服愛子以力學詩書貯連屋飛騰自
庭下玉立見鸞鷲高堂致滄澗十載京華祿八十餘三

齡長往遽不復懷貞寫哀些聊為蒿里續

題古木幽禽圖

古木含春澤紛敷枝葉清羣飛各有類動息相和鳴
藹藹天地間品物遂生成無輕畫史意可怡仁者情

送彭學修之興寧知縣

平生慕為縣可以恤嫠媪不得真由命傍觀却愴情
吾鄉有彭子發軔宰興寧送爾慎樹立行看起令名

追賦袁氏瞻衮堂

中歲謁金闕恭承明聖恩千載之所遭錫命久益蕃重
爵與厚祿頌臺燿高騫泰壇切紫霄清廟凌絳雲天子
奉明禋周旋嚴駿奔祀事國所重為榮安可言竭來遂
懸車言歸東海濱何以報盛德惓惓中心存興居兼食
息一惟我聖君祇若瞻龍衣肅若仰臨軒仰祝萬萬壽
悠久齊乾坤大書揭中堂庶庸示無諼嗟哉逝已遠敬
率惟後昆

題梅

桃李盛芳妍春風一朝歇窮冬歲華盡見此枝上雪天
寒渺空闊清香表高潔

餘姚陳處士輓詩

桂樹生堂堦秋霜悴其英秋霜自恒化能不懷芳馨人
無金石資安得獨長生形質雖化盡惟善遠益稱緬彼
林居士素履篤幽貞恂恂孝友德坦坦君子行推已務
惠濟潔身謝浮雲一朝盡天年奄茲三紀盈松栢繞丘
墓凌雲鬱青青終令懷德者憑軾愴中情

題山水圖

結纓二十載素髮忽盈簪才薄識且踈驅馳百不任憂
虞積懷抱流塵暗衣襟瀟散此誰與結廬在幽深危峰
疊蒼翠灌木鬱成陰奔泉瀉石澗浮嵐掩遥岑駘蕩時
物榮交交響春禽趣與清景會而無塵俗侵窻中南華
篇流玩以澄心相知一二輩囊琴亦來尋更迭為我彈
泠泠皆雅音怡然樂吾天撫卷心為歆俛首發長嘆悵
然興越吟

脩敬齋

士學之所本乃在方寸間出入慎省察奉持常拳拳執
虛如執玉處獨如臨尊主一不二適存養靜以專益久
虛且明萬理自森然所以德之聚古人有名言羅生豫
章裔家學探淵源脩敬揭齋扁瞻對如孔顏肅中戒外
馳宴坐必衣冠雲谷有明訓昕夕勤鑽研勉哉在惇行
勿云知者難

桃源縣

泊舟桃源縣滿目生秋草不見桃花林但見牛羊道臨
江盡茅舍繞屋惟桑棗尚有淳朴風何由恣幽討

九日發桃源遇便風

出門已六日嘉節逢重九旭日明秋空川原淨氛垢寥
寥數家村茅簷蔭榆柳綠醕堪旋沽黃花何處有張颿
乘便風舟行疾於走前岸渺彌望瞬息屬回首桃源下
百里不待晨炊後北京緬迢遞王程畏遲久舉觴問河
神明晨還送否

新安驛奉簡塞公及公素

解纜未十里崢嶸亂雲黑北風吹波立進咫尺努
力度前灣依林聊暫息船窻雨穿溜狼藉沾衣席跼蹐
擁氊毳愁坐終日夕僕夫勞敝餘飢寒皆失魄對此傷
人心奈何遠行客中宵豁陰翳青天流月色同舟各解
顏安卧免歆側人事有倉卒天道叵測識向來行路難
未有新安驛

送周布政還廣西

周子湘中彥桂芳昔同官清姿玉瓚貴雅量湖海寬所
發必歸厚所履必由端霜臺既展驥秋曹亦翔鸞中嘗
擢近職所樹皆桓桓遂授方岳寄八桂開大藩勉勉敷
上德孜孜救民難溫若春陽煦潤若時雨灑勞勤十載
餘坐鎮邊隅安考績進祿秩蒙恩復南轅嗟予久間闊
暫晤仍鮮歡相送即脩途相期惟歲寒何以表中悵聊
贈青琅玕

送芮長史致政還鄉

芮君毗陵彥發軔賢能科十年鳳凰池近侍增光華簡
陞春宮臣司經侍講席朝紳五品貴旦暮儲皇側鞠躬
勤小心言行恪有常出入謹儀度玉佩鳴瑲瑲再陞親
藩輔所寄誠獨重正道與直言肯慚賈與董春秋登七
十從容告歸休拜稽辭賢王歸朝謝宸旒我昔官桂芳
於君實聯署況復紫垣南解宇相隣住相親日相好歲
久交誼深明月映澄潭兩照知己心暮齡乃乖分關山
隔南北時誦停雲詩相望但相憶今來語未竟遽復倒

離尊重晤知何時
黽勉頻加餐

題枯木竹石

喬木風霜古貞石金鍊如所以尚志人樂偕木石俱況
有淇澳姿清風當座隅力田有餘暇足用適詩書

送徐提點被召赴北京

得向字

聖人嗣天位郊廟親玉鬯明堂一弘新禮祀徵助相之
子奉綸音詰朝戒征兩岩堯萬歲山雙闕五雲上鷓行
余將遣鶴馭子先倡紛若明漢星皆維北辰向

送史常有序

溧陽史常讀書持身不肯苟且混流俗舉進士為
行人滿九載考最陞建寧知府以廉厚自持月餘
吏畏民懷稱為賢守時朝廷遣官考察外有司清
濁材否將陞黜之考察者既不滿常之簡於其禮
而同官素以不檢為常所制者遂從而毀之然求
其過不得得其嘗罰老引商民米以贍獄囚之無
家者雖具案檢不閱而坐入已考黜當為民送詣

京師京師故舊率謂常白其實於朝當得復職常
言幸有父母雖老無恙得歸侍足矣竟不自明來
告別將歸余於常往還久相知有素其去也不能
無情故作詩送之

君子達義命不為外物騖孳孳脩其身貴賤安所遇青
蠅汙白璧自古有不慮曾參不殺人讒言令母懼直生
見誣金賞之亦不忤曖昧須臾間光明懸竹素之子抱
夙尚雍容偉儀度讀書膺薦達操節致時譽遂拜二千

石分符牧黎庶所務廉與仁果得嫜婺慕磷緇出媒藥
不辨亦不怒怡然返初服脫灑謝羈馬拜辭出都門春
華未遲暮白雲動高興清鶯滿長路家在溧水陽行行
見鄉樹上堂悅父母下堂洽親故人生有至樂豈必貴
與富念子相知舊此別何時晤浩浩繾綣懷因詩一披
露

贈蕭大慶教諭詩

有跋

西昌邑東南桃源擅瀟灑蕭氏所世居彬彬見文雅我

識斯賢翁魁厚稱長者昔在元季時寇氛充四野翁奮
捐帑藏保障厥隣社其季安敬甫清襟浩傾瀉惜哉不
永年鄉閭共嗟咤德隣自幼孤好學出陶冶於義必踴
躍於利豈苟且穰也有鳳毛幼學勤不捨黃卷三萬軸
一目數行下詵詵羣倫中指謂千里馬昨領鄉書升會
試登榜亞除授金鄉邑餞別持杯擘索我贈行言顧我
今衰也惟數學之半黽勉無自假德義士所珍富貴直
土直勗哉務進脩勿言知者寡誨人在善誘不在楚與

夏愚直苟不遺可用膺純嘏

余客蕭氏塾時大慶始數歲大慶穰字也今年及
仕矣方以明經授官則余之老也固無足恠然余
周旋其曾祖祖父間五十餘年故於贈言有惓惓
致勉之意云

送羅崇本進士歸省

北闕雨新霽上林鶯正飛朝侍豈不榮關山遠庭闈經
年定省曠累月音書稀搖搖一寸心遑知渴與飢恭承

聖主賜寧親題南歸高堂壽且康承懽足光輝家慶誠
所樂王程顧無違贈子淇澳詠自脩慎其微中和飭德
性昔賢有佩章

忠孝堂詩

有序

宿遷春秋之鍾吾也居淮之陽今南北兩京舟航
往來所必經也余屢過之其土厚水清俗質而醇
其人端而確毅而有守吾意必有才且良者生乎
其間惜未之遇也比年吾郡幕長雲衢幕佐孫郁

皆出宿遷郡人士至京師者皆譽道兩人之清勁
有執明達有為無異辭焉今年余奉旨還鄉展省
鄉人士道兩人之才且良尤多蓋謂一時江西諸
郡之為幕者鮮逮也屬時郡有賢太守四明陳侯
尤江西諸郡為守者之所鮮逮又何幸得二良幕
為之助也衢比丁家艱去惟郁在郁字文盛今考
績詣天官奏最將歸過余求其家忠孝堂詩余可
靳於一言哉為之詩曰

少小天所生
玃玃罔怙恃
永懷鞠育勞
食息靡暫置
黽勉務顯揚
卓卓挺立志
初命屬鴻臚
敬恭事廷序
西江吉名郡
再命升幕貳
顛顛秉誠節
孳孳究職事
豈直簡牘間
期裨賢守治
忠孝表厥居
夙夜圖罔愧
古來勲德人
皆起自奮勵
蒙泉達于海
寸萌干雲際
維持不息功
無遠弗可至
資孝以為忠
人道第一義
勛哉在方寸
何古不可跂

送曾蒙訓分教弋陽

明珠產合浦奇璞出藍田
士生禮義門由來端且賢
曾氏吾同里詩書奕世傳
科名起特達赫赫光後先
之子稟賦異秀質何娟娟
少小服家訓一志勤簡編
挿架皆手澤旦夕侍鑽研
致恭閭曲間出入恒顛顛
名達部使者薦上吏部銓
天子試文辭揮毫玉陛前
擢佐百里教徃分博士筵
維時七月中芙蓉秋滿川
驅車出潞濱問買江南船
弋陽幾日至定及黃花鮮
訓迪敦表率薦祀致精虔
勁翮在遠霄寧當久翱翔
功行貴及時無為孤

盛年流光逝不處佇聆清譽宣

題畫送陳景茂歸金華

孟冬寒氣肅霜葉墜紛紛把酒別故人含情睇征輪憶
子初陞時永樂第二春簡入絲綸閣一見心相親于時
幾務殷旦夕翰墨勤開口見肺肝躬勞邁羣倫兩京三
十載恭事四聖君方來未壯齡鬢毛忽成銀幡然辭寵
祿歸偶擊壤民失足遇一跌觀過知其仁平生惻怛心
傾家振饑貧九重嘉行義自天榮命新萬里謝彤庭興

逐南飛雲我我金華山流泉下泚泚梧竹蔭我屋白石
為我隣於茲坐閒逸超超絕塵氛重晤當何時安常以
自珍

送楊禮郎中還南京

季夏當炎燭時雨集行潦宛宛晴鶯鳴空埃淨於掃子
來未幾日告歸一何早愛子閩山秀襟宇清皓皓詩書
出橋門瑞玉出文縑我我天官屬最績屢書考子家賢
伯兄勲庸四朝老所重同氣良相見心傾倒連床夜聽

雨方茲豁離抱晨起復睽違中懷增慄慄我亦博同宗
交情久逾好聚合焉可常仳別未足道敬身譽所興崇
飲匪自保相期南山栢蒼翠拂穹昊

慈節堂詩

有序

浙江都指揮僉事蕭華世亨七歲其父沒於王事
母夫人年纔三十辛勤教育華成立而守節貞白
不二朝廷追錄華父之忠累進華官母夫人高年
壽康華恭致孝養恪勤臣職惟恐貽羞父母而名

譽日起間名奉母之堂曰慈節求為之詩余念其一家之間臣忠於君妻貞於夫母慈於子子孝於親可謂盛矣其亦本於父之賢乎為作五言古詩以貽之

桓桓蕭將軍秉義奮英武提劍雄萬夫委身報明主于時羽林孤未齒慟何怙鞠育兼訓教劬勞仰慈母母抱金石志矢天與天語惓惓未亡人肯愧黃泉下詔下錄功勲遺忠上天府寡穉沐寵恩榮戟光門戶鶴髮壽且

康珠翟明翠羽兒大八尺軀卓卓挺禦侮操廉贄雄藩
言言浙江泝入門祇奉養出門飭師旅一心君與親夙
夜懷靡盬惟患忝所生詎辭躬勤苦令德萃一堂肇光
自賢父聞之謾成詠用示觀風者

送王希積訓導歸西昌

子家縣城西我家縣城東兩家世婚媾況復文獻風我
生甫十年時節詣王氏所重先代交肯恥遺孽子王氏
兩尊翁顯昂衆具瞻長翁春陽煦次翁秋霜嚴矜我故

人孫每見垂接誘或頰摩其顛或引執其手隨事賜誨
教不間精與粗亦或厲顏色繩過及砭愚我稍辨路蹊
兩翁厭塵世老成一凋亡如矇迷所迹後來瓊臺公亦
得承切磋終焉聚時少不如別日多中歲仕京華而翁
亦繼起同在玉堂署還同職文史同心奉四聖兩京三
十春出入常相比居止常相隣有酒相勸酬有詩相賡
詠襟懷同一清冰雪炯相映衆星不逮旦松栢見嚴冬
向來親好人存者兩衰翁王氏森佳兒玉樹照庭廡顧

我獨何為憂煎迫心苦子出自昆岡佩服書與詩他鄉
屢邂逅無幾輒乖離朝家有大事匍匐萬里至因遂躋
高堂觀省慰親意十月薊北寒朔風斷河流豈不戀侍
下公程迫難留我具斗酒酌送子即遠道追惟子先祖
中懷怒如擣我我邑黌宮誦誦於子師問學資其求言
動表其儀才器之所成必出良模範子家崇慶守前矩
猶可鑑為教在立本致道而篤行逝川苟不息沛然達
滄溟坦坦白龍洲湜湜金魚浦庶聞百里間士習追鄒

魯

題陳憲山水

喬林遠人境，山水滿幽庭。
薰風晝南來，嚶鳴清可聽。
居貞守恬寂，聊自頤性靈。
杳杳清冥上，誰見少微星。

題青山白雲圖贈賓畿老弟南歸

白雲三萬頃，水木共清華。
衡廬不可辨，依約見仙家。
贈爾江南去，秋高八月槎。
離情方浩浩，矯首鴈行斜。

題賓畿弟竹石圖

園林春雨後新竹翠凌雲
還蔭雲根潤影影綠蘚文
清風來白日瀟灑淨塵氛

題賓畿弟木石圖

少耽木石趣家與木石隣
清滌澗泉冷潤含山霧春
應無射虎者時有斲苓人

贈楊晟叅政還福建

揚子河南俊詩書夙所務
蚤膺大廷選從事玉堂署
步履循周行居心在忠素
抽毫立螭陛鞠躬謹常度
濟濟

近侍班娟娟水玉柱一朝起高擢萬里南閩路大藩開
海隅卓卓挺疏附寒操凜清嚴春陽播溫煦八郡五十
邑謳誦出黎庶丈夫千載志功業及時樹肯墮塵俗流
甘同草木腐念子子故交化別歲已屢耳熟道路言良
慰心所慕玄冬十一月風淒氣寒沍竭來一晤對告歸
復何遽因詩寄深衷勉植後來譽

紀夢

晝眠夢故里扶竹過西家隣翁愛敬客延賞辛夷花一

觴歌一曲不覺紅日斜
覺來空悵惘飄泊尚天涯

送夷行伴讀赴西川

陳宗吾外家俊彥森
玉立永別崑山丞
夢寐恒在目
子敦厚資詩書克嗣續
溫溫秉謙恭
超超出塵俗
睽違十七年
驅馳憐僕僕
遠邑分教席
親藩陪講讀
所樂事賢王何嘗厭
微祿茲來忻慰藉
言別復匆促
對酒念離合
後期安可卜
于時積雨霽
倉庚鳴灌木
西瞻萬里橋
戚戚衝炎燠
善保千金軀
用副意所屬

送陳祭酒

邂逅不盡意，仇離難成懼。況子我素交，俱屬衰暮年。夙
遊玉堂署，文彩金琅玕。瀟灑絕埃氛，磊落出肺肝。託好
三紀餘，貞松見歲寒。升遷既遐遐，處懷思常漫漫。北觀初
盍簪，南顧遽回轅。迢迢東海陬，鄞山青鬱盤。惻惻念桑
梓，去去承明恩。良會後靡期，晚節道攸惇。黽勉各自珍，
用副平生言。

小瀛洲

晨下蓬萊宮言訪瀛洲君瀛洲咫尺地東與東華隣結
字非崇高瀟灑淨埃氛雖無弱水限門絕塵俗入金葩
間理草階祀揚清芬瓊簡兼赤書充列太古文常時白
玉堂飄拂來清真相與共玄譚造詣精入神盤出棗如
瓜森侍皆鳳麟意超紫霞表道匪玉局掄曠視六合內
逍遙任大鈞

送張萬中

十年祇奉命四牡馳騑騑考最榮陞擢新恩出彤闈肅

肅秋官署迢迢赴南畿梅花歲寒姿皎皎揚清輝君子
比素節欽哉念無違

題陳憲章巡檢山水

山翠悅人心清流堪洗耳浩浩名利途擾擾何窮已畫
史有高懷披圖思千里

題梅寄蔣子夔

別鄉四十年思鄉邈萬里朝陪玉堂講暮醉金壺醴我
有一株雪持用贈君子置之三徑中清白宛相似

步過田家有述

聯步營南門偶尋野人廬廬舍類南土繚垣樹扶疎初
柳揚青條杏萼亦已舒皤皤舍下叟迎客近門樞客問
何鄉人理生今焉如跽答家徐州始來十五餘生男皆
壯夫有孫亦蹒趨大男荷戈爰衆男務菑畬公私昔少
事溫飽常晏居老身就衰頹官長日侵漁去年旱復潦
所獲餅盎儲何以備家食指顧屋南隅園畦五六畝果
木百十株折李接桃根為力勤亦劬三歲結李實纍纍

蕃且腴盈筐易斗粟足給朝夕需言已意自得聞之亦
慚余機巧予所厭所憫為利驅博樹起後世要非仁者
徒兩戕合一體纏糾封皮膚雖能奪天造本末固已殊
物性循自然古人豈其愚興懷淳樸風俛默增嘆吁

題郭仲舉雪景山水

乾坤播清氣岡原同一色啟戶得竒觀放舟浩有適從
知山澤農豐歲占三白何況牧守者對此忘忻懌

早出安定門

結束出門行雞鳴夜過半長衢驟車馬明星爛河漢霜
壓紫貂輕風掠微醺散自無匡直才敢發驅馳嘆

謁宣府廟學

譚都督作制頗弘壯

下馬趨黉宮敬謁先聖師聖顏儼溫穆從祀森威儀簋
簋備法制堂廡何巋巍齋居豁明敞富列書與詩童冠
數十輩濟濟咸肅祇俯仰動忻懌亦復興歎咨上谷秦
所郡逢掖時所譏寥寥千載後振舉昉自茲聖代崇文
教涵濡浹邊陲陸偉哉譚公勞煥耀無窮期

揚學士乃弟仲宜歸建安以道中五景求詩贈
之

淮陰秋色

搖搖河上舟迢迢遠歸客昨發潞水湄今度清淮側
霜落秋樹紅雲連夕疇白矯首鴻鴈羣聯翩接飛翼
念我玉堂人親愛渺南北

廣陵夜雨

泊舟淮南渚向昔聞清鐘颯颯飛雨來瀟瀟洒孤蓬沿

洄距幾日氣序變寒冬望鄉行有期懷別坐無悰何時
連枝會將復彭城同

金山曉鐘

揚舫越京口中流睇金山昧旦聞禪鐘聲出島雲間急
應潮生渚飄隨月墮灣靈境富奇觀寧不懷躋攀邈迤
瞻鄉邑浩蕩棹歌還

鵝湖晴雲

投策憇鵝湖山水含清妍流雲映華旭粲粲五彩鮮雲

邊有精舍能不懷當年哲人崇麗澤至道以昭宣歸哉
懋鑽仰覃思在遺編

閩嶺停驂

辭家上京國念我同氣良會難別何易歸途阻且長行
行及閩山停驂見故鄉故鄉欣已即北望仍徬徨伯也
獨遠居我懷焉能忘

送劉叅政赴四川詩

有序

士之淹速詘信各係其命故君子惟修夫在己者

凡在外者一聽諸命無所用心焉世固有卑汙渙
忍衰號丐憐於人而得夫信與速者亦必由於其
命可得而後得之使非出於其命雖一日百十衰
號丐憐終不可得而小人之所為自屈豈惟可賤
誠可悲已君子者知守命而已其肯卑諂猥賤干
於人以求信乎如吾友劉孟鐸蓋其人也孟鐸永
樂甲申進士由翰林庶吉士歷吏部工部主事禮
部郎中廉潔而忠厚恭慎而勤勵明達大體嚴於


持已而恕於待物所至上官重之下人歸之後甲
申而升者其所存所行亦有不逮孟鐸者蓋多揚
揚高舉矣孟鐸跼蹐郎署三十年澹然如罔聞知
蓋孟鐸知守其身盡其職不肯自銜以求知未嘗
一效流俗齷齪屈已以干於權貴之門故世之知
之者亦寡知之者惟余與禮部尚書毗陵胡公最
深朝廷數命廷臣舉方面余意欲舉孟鐸以議者
不合不果上已而胡公舉之既報罷有知而誣之

者孟鐸弗自詘也今年夏胡公又舉之上知其可用擢為四川布政司叅政蓋孟鐸昔之詘命也今之信亦命也而君子之節著矣余與孟鐸同郡相交四十年於別也賦詩贈之

璞玉不自銜良工知求之君子安義命知者寧自遺劉子敦樸資敬恭勵操守蚤暮勤職業一志忠厚施郎署三十年何嘗較崇庫上荷聖主明下承上官知一朝奮高翔佐藩戒西馳平生所負挾展效庶及時當守念遐

僻宵旰恒孜孜旬宣天子德惠澤洽媵婺郡邑仗表率
貪漁待媵治用以光國命亦副知己期霖雨夏初霽高
樹鳴黃鸝繾綣杯酒間念子當遠離竊效仁者贈殷勤

歌此詞



東里續集卷五十五

欽定四庫全書

集部

東里續集卷五十六
七

詳校官檢討_臣羅國俊

中書_臣劉源溥覆勘

總校官進士_臣楊懋珩

校對官庶吉士_臣毛鳳儀

謄錄貢生_臣戈廷樸

欽定四庫全書

東里續集卷五十六

明 楊士奇 撰

詩 五言古

題竹送徐侍郎之南京戶部并簡黃少保

徐卿起毗陵卓卓才行良遭時長郎署特達清譽彰聖
朝重守邊簡賢贊軍政爰陞少司馬肅肅將帝命甘州
國西鄙密比戎狄疆宛宛籌畫運煜煜威武揚掃蕩邊
塵淨旋歸覲丹闈天顏為悅霽褒賚隆光輝當宇所攷

攷養民為首事龍虎壯南都遂進司徒貳維時五月中
暑雨亘昏晨草草戒行李匆匆發河津河水方茫洋舟
行疾於羽沂濟亂淮流超然越江浦念昔西行日醉折
揚柳枝如何復斯別託意淇上猗茲植殊凡植貞操挺
桓桓恥效艷麗姿傲兀冰霜寒元老東萊公勲庸五朝
舊我別才四旬曠若三春久卿行煩致聲善保金玉躬
上以翼聖明下以寧瘵痾

送御史方懋德還新安詩

有序

今歲六月上以恤民汰冗食於公者勅諸司官悉
准洪武職掌定額存其廉能者其餘遣歸以俟召
用新安方勉懋德溫然雅飭有賢譽於京師陞監
察御史遵勅定去留既留懋德其同道當去者兩
人相持不肯行懋德不忍其所為也自言勉實後
至請去於是三人者皆行懋德之斯行也余念相
與已久而嘆重晤末期故作詩送之

荆璞遇卞和
騏驥遇伯樂
物遇固有時
識者亦不數
方

生稟令資夙志勵問學遭逢聖明世賢科早超擢從事
詞林館簡陟頌臺幕言必循禮度動不踰矩矱雍容儕
輩間儼然雞羣鶴一朝我鷹冠莅事加秉恪持憲恕且
公守身澹以約中懷瑩澄澈外不事表襮雖然知己希
俛仰靡愧忤頃出浙水西颯颯聲作旋歸居無何冠
纓反丘壑風高秋氣清農田紛始穫林桂吐丹葩吹香
散寥廓執手送子行感歎懷抱惡子當強仕年余髮久
已皤後晤未有期努力追先覺

題李紹檢討梅花

嚴冬朔風勁草木俱凋瘁氣機運無停奄屬貞元際寒
梅動根茱勃勃出生意鮮葩皎玉雪芳馨播天地清素
自厥賦寧效天桃媚君子稟至性茲植夙所契幽齋坐
相對中懷淨氛滓相忘主與賓謳吟舒洩洩竭來玉堂
館念之心弗寘誰寫當座隅悠然見高致

送蕭仲南歸吳江

蚤登西掖垣累陟儀曹署祇命事四朝年華未衰暮任

賢屬方隆引疾遄南去自惟止足分非憚淹留故於時
八月末翩翩戒行路丹林亂曙霞黃華浥秋露踰淮絕
大江前望東吳樹慰情接親交致恭展丘墓具區涵洲
淑修梁亘津渡散策恣逍遙揚舫從逸豫却思京華日
豈復簡書慮相好三十載履行悉平素云胡當乖分欲
挽不可住矯首雲飛鴻聊寫予所慕

送鍾宏彰修撰歸省兼致意彙訓紹隆

荆山有奇璞恒為廟堂珍英才履忠信安得山澤淪鍾

子力學殖行義修諸身遭逢昭明代懷瑜謁紫宸遂登
白玉堂出入陪輔臣晨趨啟沃筵暮歸思經綸鞠躬以
效職光華映青春忠孝並所惇念我鶴髮親八年曠定
省夢寐心趨趨臣切烏烏私伏陛一再陳歸寧丹詔許
拜荷聖主仁維時春冰泮長河浩潏潏初發清路溘遄
泝沾水津暄風芍藥開照耀斑衣新上堂獻壽卮慈顏
和以忻次第省耆舊亦復展戚嫺歐鄉有君子昔者聯
朝紳超然謝塵鞅還山侶逸民南北遙相望有懷賦停

雲子歸定相見為予致慇懃

送林行簡修撰歸省

都城七月初餘暑尚鬱蒸南闕八千里念子當遠行豈
不憚馳驅庭闈激中情自違定省來荏苒十周星幸霑
近侍祿況荷褒封榮家慶未躬拜夙夜心怵怵仰承聖
主仁玉音賜歸寧相送出詞館嚴裝戒晨征升堂及秋
中丹桂揚芳馨椿萱霽晴晝蘭蕙羅堦庭被服金繡袍
煥然五色明雕盤進甘脆春酒獻壽觥歆豔傾里閭歡

娛洽親朋壺山為增秀莆水為益清人生慕樂事此樂
難具稱大哉君親德蕩蕩不可名忠孝必兩盡北歸罔
稽程春風杏花鮮遲爾清潞亭

送楊寧郎中

揚生青雲器文彩輝白璧腰間龍泉劍別來將遠適吾
聞禹徂征舞干致苗格所以宣尼訓服遠修文德好謀
而有成明明垂警飭如何材智士宏議博古昔含忿忽
遠圖急功幸苟得寧論萬里行糗糧豫峙積漢廷所遣

帥孰是趙充國子行職替襄黽勉據良畫雖有斗酒餞
不能寫胸臆臨歧念素交聊贈繞朝策

杏園雅集

鞠躬奉臣職肅肅恒自旦朝下趨經幃臨夕出東觀釐
務日有常黽勉在文翰衰齡皆沈疴寧不懷泮奭仰惟
寵祿隆而敢厭羈絆茲晨屬休沐聯鑣越閭閉適我同
志良蕭爽坐林館維時天宇澄青陽候過半好鳥鳴交
交芳卉羅絢爛朱絃一再彈圖帙亦娛玩肥甘列中筵

旨酒崇玉瓚主賓相和敬濟濟圭璋粲清言發至義連
續如珠貫雅韻含宮商高懷薄雲漢合歡情所洽輔仁
道攸贊各期勵乃修庶用表楨榦

送羅汝敬侍郎致仕南歸有序

汝敬侍郎歸自秦中奉命致仕瀕行出秦人所為
寫像屬余一言像未必似也余於汝敬往還三十
有五年知之蓋深方作五言四十韻詩送之以榮
其得退遂用書於像之端俾世之欲知汝敬者觀

吾詩足矣不必泥像也詩曰

丈夫有壯志力學希濟時時來奮挺出磊落見設施羅
君吉陽彥束髮抱負竒明經起科第玉署攻文詞既持
纂述筆亦奏雅韻詩敷陳及時政厥志將有為賜豸入
霜臺肅肅綱紀司遂陟冬卿貳將命南交馳緋袍明象
笏萬里揚旌麾蠻方瞻使節如旱甘雨垂手中五色詔
山海承華輝頓令陰曠區豁然睹赫曦歸來奏丹宸龍
顏霽融怡夙興佐司空立侍白玉墀朝回坐粉署職務

勤所思東南吳越邦貢賦國所資奉旨督漕運綜理適
攸宜于時嚴武衛所重在西師四牡行駢駢改途越邠
岐兵彊自餉厚篤意理畬蓄豪橫輟侵效游惰歸耘耔
河渠靡不溉田蕪靡不治雨暘屬時若倉庾崇如坻張
掖暨靈武周巡以諏咨所可利下人計不遺毫絲矢心
弗自顧屢冒艱與危歲久罄勞瘁上軫天惻慈明恩錫
休致超超赴南歸老驥思舊握倦翼投故枝而況達士
懷物理鑿成虧親交並祖餞酣歌舞傲傲詰旦發潞河

薄暮經淮沂流鶯沸驛路飛花滿彎碕沂江越彭蠡挂
席捷於飛船頭見玉峽霞彩煜英蕤振袂儒林坊迓者
陳杯匝展席老人亭會者皆及耆一返安樂窩永謝塵
務羈顧余樗散質衰疾加倍之乞身朝夕間盍簪不遠
期

奉送叅政方相公南歸並託致意兩司相公誠
有私瀆伏惟高明不以區區私家而廢公法是
見愛甚厚不敢忘大德也

廬江山水清從昔挺英傑周陶暨包馬先後奮功烈方
君服詩書夙志希徃哲發軔自成均簪纓儼朝列叢脞
冬官務旦暮勞瑣屑鞠躬殫臣職肯用愆毫髮羣儕混
汙流獨秉清素節上荷當宁知簡陞遂超越豫章佐方
岳雅度湖江濶咨諏得民隱封章屢陳說荏苒三周星
報政謁金闕於余同朝舊邂逅兩相悅祖送崇文門盛
夏赫炎熱道路念驅馳況復當遠別朝望東岱雲夕對
秦淮月到官秋及中丹桂香堪折置酒勞還歸芳筵集

藩臬因聲謝諸公有瀆恕老拙細人困窮攔所仗明仁
活薰猶本異物善惡在旌別大田植黍稷必去螟螣蠶
所以古仁人除惡當果決致公而平施豈為有勢奪賤
子固甚愚公理敢私臧明達高賢心幸不誚干聒

輓俞漢遠詩

有序

會稽俞漢遠清雅士也嘗因微累謫戍邊比歲詔
下求賢藩臣屢舉漢遠輒為有司所格於是負累
重於漢遠者多遂見用蓋漢遠命也漢遠善作山

林畫障寫春草尤佳士大夫賢者與之游多得之
非其人漢遠未嘗輕畀也故不樂之者亦多今漢
遠已矣故作詩輓之

窮通各有命匪人所克為俞生越鄉彥落落荆璞資一
朝汙蒼蠅棄置在塗泥良工屢回顧昧者掩抑之俞生
安義分浩浩曠達懷庭堦絕塵雜春草含碧滋對之襟
宇融點染出天機興來寫川岳奮筆疾若飛以斯自陶
適貴富邈罔知自偶清者遊寧慚俗流疵如何逐化物

奄忽在今茲豈徒同儕憾上有慈母悲幽室杳冥冥懷
舊書此詞

題謝廷循作山水二幅

結纓四十年雞鳴候朝謁晨趨白玉堂暮下青瑣闥豈
不勤寸心曾何効毫髮對此圖中人空慚頭上雪

秋日明錦樹秋水漾輕艫得魚足充庖亦足供酒壺青
山常為隣白鷗常為徒不識簪纓貴焉知憂與虞

進善姪南歸書此與之為別到家賓畿老弟亦

可觀也

秋高薊北寒念爾遠離別老人七十餘臨別增悽切九
年在北京扶持多資爾爾有仲父望惓惓心未已黃花
浥白露買舟發潞河江湖六千里慎哉所經過到家冬
已半升堂拜仲父仲父喜姪來深憐遠行苦取酒慰骨
肉懽極情還悲子姪能幾人衰年頻遠離停杯有咨詢
從知先老拙繾綣兄弟懷殷勤爾能說十載隔南北督
贖兼沈痾無由歸聚首悵望其如何丘原展先壠里閨

省親故除歲又新年相期戒行路正月春冰解桃杏鮮
花繁老人注兩目望爾東南門

送萬太守歸嚴陵

聖人御宸極宵衣念元元簡賢付綏撫申以獎勵恩萬
子豫章彥文科起高騫十年我豸冠北面奉至尊繡衣
豔丰采白筆敷直言遂膺郡符寄高蓋擁彤幡嚴陵古
睦州山水清鬱盤民淳風俗良政務故不繁所尚簡為
治教養心彌敦詩書振黌宮耒耜勤田園東風藹林垆

里胥無及門遠邇誦賢守聲聞重璵璠念子吾故交久
別情鬱煩茲來未幾日匆匆復南轅嘗聞范與趙為睦
令績存勗哉紹前修以副平生言

題蔣壻重梅

北風振長林黃葉蕭蕭下大地一清肅梅花獨瀟灑紛
看雪滿枝已覺春在野不有貞白心誰知歲寒者

題湯節都指揮蘭雪齋

湯侯心跡清瀟灑蘭與雪惟蘭媿芳馨惟雪儼素潔讀

書負高志武爵承世勲緩帶杜元凱雅歌祭將軍分閫
帥淮南大藩佐江右蘭雪凜清風從初未嘗有功並西
山立名與章江流金貂圖麟閣努力追前修

題歐陽廣湯梅花

西昌歐陽生明經起科目當宁敬刑罰擢官秋卿屬生
抱忠厚資況奉先訓篤夜燭治官書求生於死獄所聽
兩造詞不厭四五覆明鑑靡遁情被辜皆誠服門庭淨
若洗襟懷皎於玉勉勉持廉虛孜孜存洞屬司寇上賢

績爰進秩與祿特達騰聲譽恬澹寡嗜欲堦砌絕氛埃
不雜桃李俗雪色素梅花先春爛盈矚公餘坐相對人
物兩清馥

題竹寄子謨同知有序

子謨之左遷相知者皆為稱屈子謨安於其命不
一毫置意而所為屈子謨者人亦信天道之不爽
故余因寄此竹并書此

修筠生平陸荆棘叢翳之荆棘承雪霜摧折遽無遺修

筠當歲寒秀色終不移小人抱齷齪志與君子違枘鑿
豈相入萋斐騰誣辭溷夷而廉跖豈云天可欺天道匪
茫昧讒夫寧幾時達士固貞節安命誠奚疑臧氏不見
尤大賢有明規因成修筠詠遙贈心所期

題梅花贈別朱與言

久別欣會合將離懷繾綣何況夙心親家居接鄉縣念
子五雲秀束髮異羣彥明經掇賢科立志挺高狷溫潤
玉無瑕精勁金百鍊荆益奠大藩白簡佐司憲雍雍春

陽度肅肅秋霜面幽隱亟咨諏貪濁嚴懲勸蜚英達宸
聰登崇自廷薦南京根本地都臺紀綱建秉誠敷獻替
致明決議讞孤特昔張昇正貞今趙抃昨者考績來謁
帝大明殿引疾却奏函歸展膺天眷夏初氣清和楊花
競飛燕豈無一斗酒衰老違郊餞贈此玉梅花聊慰情
所戀期共保清素歲暮長相見

送李員外致仕

有序

天台李君茂弘廉介方正君子也初舉進士未授

官清譽已勃勃既擢吏部主事陞員外郎士大夫
皆知其賢秩滿未及引年懇引疾去一時輿議共
惜之故賦詩送之

荆玉韞在石光潤被林立明珠潛九淵清耀亦上浮君
子未顯達芳譽難可度挺特松栢心恥與桃李侔一朝
被采擇共睹升琳璆豈不貴且重廊廟未及收鄧林有
竒才匠石當知求丈夫高世節焉能銜自售冉冉年歲
馳決意無淹留九河潦水淨行雲淡油油零露浥丹桂

天香滿道周飄然拂衣去清風含九秋

中秋夕過澹齋戲柬

秋霄愛月華徐步過東家主人喜客至汲井淪春茶青
帘在隣館無錢不可賒何似陶彭澤重陽把菊花

題竹送何士彥宣城訓導并寄聲袁太守

何君璞玉良產自荆山中中懷縝而栗外儀溫且恭家
學邃六義允紹武岡公頃膺宣城聘分教侯類宮隨牘
謁金門考藝趨九重詰朝奉除書戒行遽匆匆經年忝

交誼祖送城之東何以贈此別聊託修竹叢此植挺特
姿千仞凌高空生際太平世盛年須奮庸啟迪貴知本
表率自飭躬況茲山水郡昔賢多顯融作興諒匪難行
當律成功寄聲袁太守勉續黃與龔學教同振起達材
佐時雍

貝錦貽魏洪二侍郎

修竹本孤直叢蒿掩翳之叢蒿豈不蕃竹色青不移經
星麗崇霄陰霧蔽其輝終焉安得蔽陰霧寧幾時小人

抱齷齪君子素肯違青蠅與貝錦盈庭騰誹辭平陸起
波濤豈云天可欺天道固包含聖讒有往規

題梅花有贈

相見桃源下相送長淮側清談夜向中月照蓬窻白愛
君好心事況復真顏色聊贈玉梅花交情矢無斃

采石夜泊與仰善之夔二姪話別

暮發金陵浦前瞻采石磯渺渺江潮上娟娟江月輝昔
離忻乍合明發念將違嘉卉豈乏觀三春艷芳菲不如

栢與松凌雲起百圍君子堅貞操敬哉慎其微

魯港

經旬坐舟中跼蹐心鬱鬱度江見青山蒼翠連延好
風從北來持杯興浩發宛轉聽棹謳開蓬對明月

九華山

昔年李太白吟咏秋浦清一覽九峯秀被之九華名夫
容發菡萏宛然天削成蒼翠五千仞日照雲錦明上與
沈寥通下絕世俗情豈無冥栖者鍊藥希長生吾將往

從之何由謝塵纓

題竹寄盧邦臣

結交已三紀玉署昔聯官重以同江鄉詞垣日聚懽升
遷歷中外屢見歲華殫昨來謁京師仍嗟會晤難共榮
師席尊猶憶客氊寒我行過匡南悵望隔林巒久要意
不盡聊寄青琅玕

題梅與從孫翹

吾本清白宗西昌四伯禊孝友惇家庭詩書累科第炳

然冰雪持靡間處與仕先德既日遠後裔流或異我出
四十年歸來重嗟喟諸孫森森中靜厚頗見翹言動弗
佻輕鄉閭免譏議以茲恒近之出入左右侍老人行有
日王程敢稽遲臨別贈瑤華老人有深意爾翹尚勉旃
力學無廢墜旦暮事簡冊躬行在仁義慎勿效流俗齷
齷苟汙利明明待制公清名傳良吏子孫當敬念庶不
忝先世

題梅贈李學士

有序

時勉學士不遠二百里辱貴臨而匆匆未盡懷遠
別書此奉贈致意云

春皋麥欲黃春城柳紛綠君子枉青顏東來過詭屋鄰
甕分濁醪書窓剪明燭平生金蘭交一笑懽未足僕夫
晨在門跼言農事促執手送將歸飛花爛盈目何以贈
茲植孤芳挺貞泚高齋坐相對歲晏人如玉

峽江留別汝敬侍郎

始夏積雨霽浩浩滄江平故人念久別又復憐遠行慰

我金洲館送我玉峽驛繆綢解晤言繾綣重離折我出
四十年暫歸席未暖何如君子懷坦蕩恣蕭散遠絕塵
市聒嘯咏山水清庭無干瀆人坐有吾伊聲贈子以瑤
華愛子心相類何日遂投簪歸來同晏歲

德州城下題竹寄劉仲兼

謬忝玉堂署荏苒四十年始來當壯齡不覺今皓顛水
木有本源誰能忘桑梓耿耿旦暮心迢遙七千里仰承
聖主仁優詔賜暫歸歸來入閭巷十室已九非素交皆

下泉存者才百一容顏變故常聆音但彷彿豈之後來
者貌同多異心鷓鴣巢產鳳窠枳棘生桂林感我衰病懷
憂來向誰道前後左右人雷同譏我耄賢哉吏部孫夙
昔吾所知居貞而履素身老心不移念我久此離時來
相慰藉言必合典則義不苟取舍譬如羣飛中見此五
色鸞又如叢薈中見此青琅玕我行有程期過別情纏
繚別來未幾日憶子常在眼因風寄平安託此修竹枝
歲晏當來歸永結林下期

題竹寄良姪

嗣宗與兄子俱是竹林人
遠道念阿咸平生心所親
去鄉越三紀還鄉甫四旬
契濶未及展繾綣未獲伸
南風吹大江官船發江濱
爾從五雲來追餞螺川津
相違甫旬浹相思渺煙雲
上堂侍慈親致養供晨昏
下堂飭諸子力學追前聞
先塋布垆野能不懷深恩
春秋雨露零灑掃無憚勤
愛爾剛直資殷勤贈霜筠
常固清貞節用以謝塵氛

送王原之詩

有序

四明王原之自監察御史陞山西叅政廉清明大
體纘纘以國家生民為心而讒人忌之造言嗾當
道擯諸重法賴上明聖照察詔復其官而改廣東
其造言者適以貪淫黜廢諒哉天道之不爽也余
知原之有素其南行也周汝清出此圖求詩贈之
勉賦三章其末章蓋揆天道入心猶不能已於言
焉

暮春時雨霽嘉卉蔚紛敷交交黃鳥鳴送子城東隅念
茲萬里別執轡仍躊躇丈夫四海志誰能倦馳驅所重
在兼濟奉國效良圖鞠躬罄丹誠千春垂令譽

雄藩庾嶺外邈在南海壘山川曠阻隔氣候何其偏九
齡與安道自昔有名賢如何巖谷幽曠俗比難鑄仁化
可革頑文教可柔堅君子奉皇命敬哉贊旬宣

青松起中林棘蔓纏其枝棘蔓一朝萎墮墮淪汙泥松
枝稟貞性干雲色不移志士履清潔而遭讒慝誓天道

詎可欺讒者旋自墮臨別舉離觴猶嗟貝錦詩

贈吳淳

大器必晚成早達多幸致園柳迎春發不待秋霜悴青
青南山栢百歲升雲際明堂選棟梁匠石來擬議凡古
賢哲人孰不懷用世不惜發軔遲惟患道未至流俗競
苟得終焉速顛躓卓哉漆雕生明達見大意吳生海虞
秀詩禮家有自夙承大父訓稽古研經義昨奉賢能書
霜蹄偶一蹶隆然敬執友於我頻見詣温温崑玉資颯

顛負志氣久別留臺君對此喜忘寐于時夏六月積雨
旦初霽宛宛黃鳥鳴葵榴豔榮麗辭我將南旋何以效
贈遺厚積而遲發周行騁良驥不聞任公釣豈為目前
計往哉加進修雲霄匪難跂

醉後調時彥

久坐倦煩燠澄景回素商青冥下湛露丹桂揚天香濟
濟金閨彥高會白玉堂和洽諧琴瑟況復惜時光西齋
有旨酒何由共華觴

送少師楊公歸建安有序

少師工部尚書兼謹身殿大學士建安楊公勉仁起高科歷事四朝勞勤四十年而不至其鄉者三十年今年七十桑梓之念迫切遂以情聞聖明深照其衷特命之歸賜勅褒嘉且勉之速至而加以厚賚皇上禮遇大臣恩至隆矣公為人敏於才周於慮惓惓敬君愛民之心焉昔成周盛時君之待臣必體其心而厚其禮臣之事君必先其公而後

其私上下交盡其道此其治效之所由盛也於公斯行有以見古昔盛治復興於今日非千載之遇乎士竒與公處三十有九年同宗同志同歷官同治職務去歲之春上憫士竒違鄉四十年先賜歸省所以命之者亦同於公之今日士竒春復而夏來不敢稽也固公之道里遠於余惟公之心必有同於余者故於別也次第其事為韻語贈焉其詞曰富貴還故鄉古今所欣快安知明達人志出富貴外立

身天地間所重孝與忠君親與天等敬事道實同揚公
南閩英天稟挺卓特冒中書五車筆下雲五色三十登
金門射策奮高騫天興聖明主躬被汪濊恩清密侍丹
宸輝煌裁紫詔玉署兼青坊高步儒林表龍輿戒巡省
我冠扈屬車平戎萬里道橐鞬行秘書黽勉三紀餘服
事四朝聖孤卿百僚上高年偕鴻慶思以上益君思以
下益民小心効臣職亶亶據恭勤恭勤副深注聲譽聞
遐裔蒼松老益堅皓首心愈厲國事靡違暇親恩詎能

遺卅年別丘壘寢食勞懷思不見白鶴峯飛雲恒在望
手植壟頭栢應過十圍壯豈惟羨牆覲夜夜夢旋歸水
木有源本誰能不獻欵仰荷明主仁洞鑑中迫切璽書
賜展省龍光昭日月陽和二月中御柳初含金凝冰泮
九河好鳥繁春音驪駒發都門官僚皆祖餞渡濟遂踰
淮載馳駛於箭暄風芍藥時候者集龍津矯首睇桑梓
含情兼戚忻追遠致裡祀懷舊訪親愛歲久多凋亡相
知幾人在言歸席未暖豈不耽家居恭承玉旨重尚敢

淹躄蹻廟謨待公陳袞闕待公補丈夫君臣義無為倦
衰暮炎光變素顯涼露下青蕪預買中山醪迓公東城
隅

贈澹菴楊公展墓詩

有序五首

少保澹菴楊公與僕交四十餘年昔同事三聖於
玉署青宮今同事上於經筵祕閣公一志於道以
國家天下為心端方直諒謀猷獻納要當追配古
人今館閣四朝之舊獨公與僕兩人在僕年七十

有七衰病日加而乞身終未能得然終不能分寸
裨益公復奉命歸展桑梓則僕於別也其能無情
故賦詩五章贈公且以寓余之拳拳云

東風吹大河河水日夜流嚴裝逝將歸祖送河上頭故
鄉六千里迢迢望荊州違別歲年遠耿耿桑梓憂恭承
當宁命去去無淹留焉知同袍者臨分意綢繆

綢繆條已分望望猶佇跂豈無相交人外同中乃異夫
子夙所慕爰結金蘭契瞻言資諒直矧重仁與義荏苒

四十年氣合恒一致皎皎松栢心永矢在終歲

終歲之所懷豈緣耄疾躬上有明主仁德比三聖隆人
生非草木寧昧造化功出身儋祿爵道存敬與忠夙秉
高潔心況聞賢達風焉能甘澠忍委軀儕凡庸

凡庸諒猥鄙貪憚復蝨蝨良農治田穡稂莠在艾除倬
彼仁賢士懷負經世具臯陶陳知人周公躬吐哺如何
後來者當道昧所務所以君子心惻惻存永慮

永慮積中抱臨食每興慨丈夫所立志豈在富與貴不

聞諸葛云鞠躬以盡瘁上將益明德下將綏四海夷險不可渝頰仰庶無愧勿為久契濶引領遥相待

喜稷將至復慮炎暑

衰年久別離豈不懷歡聚書緘初未收傳聞遽乃屢炎熱三伏辰江湖六千路注目暮及朝關情喜兼懼積著時自把燈花亦頻顧露坐思徘徊今夕知何處而況老者心猶憶諸孫慕

送尚書魏公致仕還鄉詩有序

僕以直道於世寡合獨秋官尚書南康魏公侍郎
建昌何公近皆以同江右故有相得之樂相資之
益前年何公引疾去僕不能無情作詩送之今年
魏公又引疾去僕之中懷其能已乎臨岐執別情
見於詞云

江右國南服賢才之林數匡廬彭蠡間清淑萃加厚英
英魏文淵人物星之斗明經在致用一第咄嗟取我薦
入烏臺白簡歲年久擊邪奮無前直枉寧肯後超躋副

浙憲聲華聳岡阜簡陟少秋官式貳大司寇致鞫懸鑑
明析疑迎刃剖大梁困歲饑方伯拜廷授悉心事旬宣
勦力蘇稿朽歸來掌邦禁雍容帝左右既詰姦慝平亦
著武績茂廉清一志堅聞望六官首方茲切倚毗云何
慕畝畝惟皇憫疾疢且重違耆耆錫之五色書龍光煥
戶牖久行遂歸止福祉自天祐川開萬里風南颿駛於
走雲淨九疊屏烟消彭澤柳迎門集童穉携觴聚隣叟
懽慶溢鄉閭勞問洽親舊超超天地外此樂寧多有蹇

予樸鈍質頽齡七旬九謬叨詞林館固陋寡所偶責重
力不任兢兢慮災咎所藉同鄉邦同心二三友有言相
啟發有病相砭灸何君既離郡魏公復分手念此增悲
慨中懷雜紛糅歲晚應乞身歸程能待否市酒望湖亭
玉壺為君扣

寄友

同館闊相別相思春復秋十年見桑梓適意正綢繆歡
聚故隣曲閒尋舊釣遊寧知鷓鳳侶延望在瀛洲

武昌遊道院 分韻二首

仙館俯崇岡振衣一來遊逍遙越城肆窈窕經林丘谷
口巖溜鳴簷端雲氣浮適違闐闐喧彌覺山水幽啼鳥
遷高枝悲猿振長楸物類爰有託矧伊學道儔抱生貴
知足全形尚無求療饑采紫芝濯纓臨素流愚生昧所
處靜趣乃相伴援琴弄清絃遂令佳賞酌王師事遐征
苦辛殊未休豈不懷寧處違世安可謀我非學仙侶悵
然難久留 右幽字

通衢擁車騎四術羅第宅仙宮鬱雲興邈與紅塵隔交
疏被朱綉飛甍絢金碧竹樹紛掩映烟霞互輝赫爰有
一羽人於焉托其跡皓皓白玉姿翩翩異人格我來扣
松關相與論玄默階前孤鶴舞林下啼猿寂于茲究典
墳信足探幽頤無田寄閒身翹思羨鄉國天台與赤城
聊可資遊息丹丘有遺構瓊臺多舊識胡為曠歸期久

作周南客 右客字

送蕭雅容主事考績之行

中臺切雲漢特達羅俊賢有美吾鄉彥白璧何娟娟温
恭君子容素尚金石堅高科出奮躍石渠踰歲年爰擢
司馬屬聲華日蜚騫殷殷職務崇爰爰簡牘繁志存行
靡渝道明施罔愆考績及茲晨嚴裝起翩翩維時屆初
夏芳榮被郊原登臚指清濟揚舫循廣川緬懷趨謁餘
周遊鳳闕前倘遇玉堂侶因寄停雲篇

羅進文妻周娟抱子安同赴水死

東方有綵鳳雄雌鳴相和誕生五色雛巢在高樹柯雄

飛觸虞繳哀雌憂欲死哀雌憂欲死銜子忽墮水雄來
脫虞繳空巢委高枝不見舊匹侶孤悲無已時艱難兩
訣絕苦哉誰為陳君看羅氏婦萬古同酸辛

送熊御史歸南京

秋雨灑梧桐西風動楊柳之子憶南京開帆潞河口平
生所相好不在餞杯酒持贈歲寒枝清操期堅久

送樂象乾赴湖廣按察經歷

河凍不可舟日久寒威厲之子奉明恩翩翩發征騎殷

勤遠別言繾綣同鄉意誓將冰雪心用稱風霜吏

東里續集卷五十六